

周
易
訂
疑

周易訂疑卷之十五

樂陵董養性邁公輯著

弟養中建公較正

序卦傳

疏序卦者。文王既繫六十四卦。分為上下二篇。先後之次。其理
不見。故孔子就上下二經。各序其相次之義。故謂之序卦焉。周
氏就序卦。以六門往攝。第一天道門。第二人事門。第三相因門。
第四相反門。第五相須門。第六相病門。如乾之次坤。泰之次否。
是天道運數門也。如訟必有師。師必有比。此等是人事門也。如
因小畜生履。因履故通等。是相因門也。如遯極反壯。動竟歸止。

等。是相反門也。如大有須謙。蒙待養等。是相須門也。如賁盡
致剝。進極致傷等。是相病門也。韓康伯云。序卦之所明。非易之
緼也。蓋因卦之次。托象以明意。不取深緼之義。故云非易之緼。
故以取其人理也。今驗六十四卦。二二相偶。非覆即變。覆者表
裏視之。遂成兩卦也。屯蒙需訟師比之類。是也。變者反覆唯成
一卦。則變以對之。乾坤坎離大過頤中孚小過之類。是也。訂疑
六門之說。亦是序卦之例。不過六者。非覆即變二語。亦簡而盡。
程子曰。康伯謂序卦非易之緼。此不合道。
或問序卦非聖人之書。信乎。朱子曰。此沙隨程氏之說也。先儒

以為非聖人之緼。其以為謂非聖人之精。則不可。周子分精與緼字甚分明。序卦却正是易之緼。事之夾雜都在裏面。如易有太極。是生而儀。而儀生四象。四象生八卦。這是易之精。

訂疑帝出乎震八句。是後天八卦之序。序卦傳。是後天六十四卦之序也。謂序卦非聖人之書。帝出乎震亦非乎。

臨川吳氏曰。羲皇六十四卦之序。始乾終坤。蓋奇畫偶畫之上。每加一奇一偶。二而四。四而八。八而十六。十六而三十二。三十二而六十四。乃其生卦自然之序。非人所安排也。後之易各因

叢皇之卦而其序不同如連山之首艮歸藏之首坤不復知其
六十四卦之序何如矣蓋文王既立卦名之後而次其先後之
序如此而夫子為之傳以發明其卦序之意或者乃疑其非夫
子之作張子曰序卦不可謂非聖人之緼其間雖无極至精義
大槩皆有意思今欲安置一物猶求審處况聖人于易必須布
通精密如此大匠豈以一芥可知哉

雙湖胡氏曰文王序卦大抵本先天圖以東西南北四正卦乾
坤坎離為上經之始終以西北隅艮東南隅兌合而為咸西南
隅巽東北隅震合而為恒四隅反卦為下經之始而終之以既

未濟則亦坎離之交不交也。故乾坤坎離四純卦皆居上經。震巽艮兌四純卦皆居下經。又以反對為次。夫子序卦直以卦名發其次第之義。而他則未暇及耳。

蒙引此亦聖人之緼。因卦以發者。中間有不可求之太深處。蓋聖人只是畧借卦名以序其所以相承者。不為无義耳。如德體之類。皆在所畧也。朱子以前已有疑其非聖人之筆者。朱子不敢以為然。蓋中間至理自不可誣。其有近于牽合者。學者當虛心旁義以求之。亦未為无所發也。但不可鑽研太過耳。先儒嘗論學者之病。曰本淺也。而鑿之使深是也。○序卦傳所謂流行

之○易○也○雜○卦○傳○所○云○對○待○之○易○也○二○傳○之○作○聖○人○之○所○不○容○缺○也○

梁山來氏曰序卦者孔子因文王之序卦就此一端之理以序之也一端之理在所畧孔子分明恐後人雜亂文王之序卦故借此一端之理以序之

湯霍林曰序卦之義不必牽紐上下文相貫只隨各項立說訂疑唐鼎祚取序卦冠之卦首程傳于各卦之首○先摘序卦傳而釋之○故繫辭傳說卦傳雜卦傳程子皆无傳獨序卦有之○欲觀序卦程傳全文當于六十四卦之首觀之○

有天地然後萬物生焉

臨川吳氏曰此言乾坤所以為上經之首也天地謂乾坤
訂疑此句當合下至盈也為一段

盈天地之間者惟萬物故受之以屯屯者盈也

程傳萬物始生鬱結未通故為盈塞于天地之間天地生萬物
屯物之始生故繼乾坤之後

訂疑有天地至盈也語意已畢屯者物之始生也自是起始生
必蒙句程傳合為一意非也

平庵項氏曰屯不訓盈剛柔始交雷雨動盪其氣充盈故謂之

盈耳

蒙引萬物無動植之類言

說統萬物資始乾道萬物資生坤道也繼乾坤故繼而言之
訂疑天開于子地闢于丑人生于寅言萬物則人在其中矣

屯者物之始生也始生必蒙故受之以蒙蒙者蒙也物之穉也

疏王肅云屯剛柔始交而難生故為物始生也盧氏云物之始
生故屯難皆以物之始生釋屯難之義按上言屯者盈也釋屯
次乾坤其言已畢更言屯者物之始生者開說下物生必蒙直
取始生之義非重釋屯之名也

訂疑此屯字一訓盈一訓始生皆无難義不可混入
蒙引物生必蒙專就動物之有知覺者言

梁山來氏曰物之始生精神未發若蒙冒然故屯後繼蒙蒙者
蒙也上蒙字卦名下蒙字物之象也

伊繼山曰物生必蒙此句緊承上句物之始生言蒙也之蒙應
物生必蒙

程傳屯者物之始生物始生釋小蒙昧未發蒙所以次屯也
訂疑物之釋也本以起下物釋不可不養程傳以合上文似非
然欲屬之下文語氣亦未穩

物釋不可不養也。故受之以需。需者飲食之道也。

程傳：夫物之幼釋，必待養而成。養物之所需者，飲食也。故曰：需者，飲食之道也。雲上于天，有蒸潤之象。飲食所以潤益于物，故需為飲食之道。所以次蒙也。卦之大意，須待之義。序卦取所須之大者耳。

漢上朱氏曰：幼釋而无以養之，則天閼不遂。蓄德養才，亦然。訂疑：蓄德養才，乃蒙卦辭之意。此處用不着。

飲食必有訟，故受之以訟。

註：有生則有資，有資則爭興也。

程傳人之所需者飲食既有所須爭訟所由起也訟所以次需也

漢上朱氏曰乾離以愆豚酒生禍有血氣者必有爭心故次以訟

蒙引飲食人之大欲也天生斯民有欲則爭故需後承之以訟揆其理勢之必然也

訟必有衆起故受之以師師者衆也

程傳師之興由有爭也所以次訟也

訂疑師以兵旅言蒙引曰自因微致大之理非謂訟必用衆也

蒙引人之有訟必各有朋黨彼以朋黨而起者非一人此以朋黨而起者亦非一人是有衆起也皆理勢必然也

湯霍林曰師者衆也承上起下

衆必有所比故受之以比比者比也

程傳比親輔也人之類必相親輔然後能安故有衆則必有所比比所以次師也

蒙引舊說衆必有所比為我者與我相比為彼者與彼相比此是連訟意非矣須改轉頭項說去方是傳之本意衆須聚于一乃理之必然也語其最下盜賊至為不道亦必有統屬必相聽

順不然則叛亂无統不能一日相聚矣

說統民生至衆无主乃亂
訂疑比者比也承上起下

比必有所畜故受之以小畜

蒙引意似當謂必有以畜之者更詳之

說統比受以小畜庶而富畜受以履富而教畜有止而聚之
義乃積畜之畜畜而謂之小畜猶云衣食粗足經制未備未是
王道了局處也

物畜然後有禮故受之以履

訂疑物畜二字亦有二解。若說禮義生于富足。則物指民間生
殖之物言。若說禮生于人之既聚。則物字以人言。易抄之說是
也。抄曰。物既畜聚。則君臣上下之分。父子兄弟之倫。隱々自具。
聖人即其自具者。制之為禮。因之而非強之也。但上文曰。衆
四比。是人既聚。此物字。若再指人說。則甚複矣。
說統衆必有所比。治之而爭奪息矣。比必有所畜。道之而生養
遂矣。物畜然後有禮。教之而倫理明矣。

養而泰然後安。故受之以泰。

本義晁氏曰。鄭無而泰二字。

蒙引人有禮以相處。然後彼此各得其分而安矣。曲禮所謂有禮則安。无禮則危也。

泰者通也。物不可以終通。故受之以否。

程傳：夫物理往來通泰之極。則必否。否所以次泰也。

南軒張氏曰：治亂相仍如環无端。物安有久通者乎？故受之以

否。夫泰而驕所以致否。否而畏所以復泰。

待立致之肯

三山吳氏曰：泰否之機常相待也。亦常相禪也。先天之卦泰以否對。後天之卦泰以否繼。對則遠而繼則近也。先天自乾八卦便至泰。泰三十二卦方至否。泰易而否難也。後天自乾十卦方

周易訂疑

卷十五

八

正誼堂

至泰泰一卦便至否泰難而否易也雖否而泰泰而否有若循環然泰之中又有否否之中又有泰倚伏之機可畏也哉
誠齋楊氏曰乾坤開闢之世乎屯蒙洪荒之世乎需養結絕之世乎訟師阪泉涿鹿之世乎高履書契大法之世乎泰通堯舜雍熙之世乎過此而後泰而否否而泰一治一亂治少亂多泰豈可復哉故曰泰其上古之極治乎
厚齋馮氏曰自乾坤之後始涉人道經歷六坎險阻備嘗內有所畜外有所履然後致泰而泰之世否即繼之以此知斯人之生立之難而喪之易國家之興成之難而敗之易天下之治致

之難而亂之易此又序易者之深意而亦天地自然之理也

物不可以終否故受之以同人

程傳天地不交則為否上下相同則為同人與否義相反故相
次又世之方否必與人同力力一作欲乃能濟同人所以次否
也

與人同者物必歸焉故受之以大有有大者不可以盈故受之以
謙有大而能謙必豫故受之以豫

程傳豫承二卦之義而為次也

蒙引有大而持之以謙則能保其所有而樂也

周易訂疑

卷十五 序卦

九

止誼堂

說統豫次謙而必從大有說來。惟滿而不溢。然後見其能謙也。或曰：民心豫樂。或曰：能保其所有之大。而豫樂。兼此二義。方全。○同人至豫一段。見致治保治之道。歸到君心上去。○同人者。公○好○公○惡○不○拂○天○下○之○心○謙○者○畏○天○勤○民○不○恃○天○下○之○有○豫○則○常○保○其○有○而○樂○以○天○下○矣○

豫必有隨。故受之以隨。

程傳說豫之道。物所隨也。隨所以次豫也。

疏鄭玄曰：喜樂而出。人則隨從。孟子曰：吾王不遊。吾何以休。吾王不豫。吾何以助。此之謂也。王肅亦云：按豫卦彖云：豫剛應而

志行順而動。故天地如之。而况建侯行師乎。云云其意以聖人順動為物所說。所以為豫。人既說豫。自然隨之。若以人君喜說人則隨之。紂作靡靡之樂。長夜之飲。何為天下離畔乎。說統豫以人心和樂言。然所以致人心之和樂者。仍在君以喜隨人者。必有事故受之。以蠱蠱者事也。

程傳承二卦之義。以為次也。夫喜說以隨于人者。必有事也。无事則何喜何隨。蠱所以次隨也。蠱事也。蠱非訓事。蠱乃有事也。訂疑程傳似以因有事而後隨者。文意倒置。義亦欠明。

蒙引以喜隨人者。非无故也。必有其事。如臣之事。訂疑當作隨。

君必以治天職為事。弟子之隨師必以受業解惑為事。亦說不明以喜隨人意。

說統以喜隨人。欲相與以有成也。見情非出于勉強也。有事主好邊說。所謂明良喜起以成功者。○又有謂以喜說隨人。依阿苟且。其勢必至敝壞而有事者亦通。訂疑前說如蒙卦後說唯可用于彖傳釋卦名義處。詳序卦傳上下文。並無此意。不可從。

訂疑以喜二字當作衍文耳。

有事而後可大故受之以臨臨者大也。

註可大之業由事而生。

平庵項氏曰臨不訓大大者以上臨下以大臨小凡稱臨者皆大者之事故以大稱之若豐者大也則真訓大也

蒙引兼學問德業言

物大然後可觀故受之以觀

臨川吳氏曰物之小者在下觀之而不見必大而後可以觀也南軒張氏曰天下皆山也唯泰山可觀天下皆水也唯東海可觀況于人乎

蒙引大兼德業說

可觀而後有所合故受之以噬嗑噬嗑者合也

程傳既有可觀然後有來合之者也。噬嗑所以次觀也。
漢上朱氏曰：在上无可觀在下引而去矣。非可觀而能有合乎。
蒙引亦無德業言。

物不可以苟合而已。故受之以賁。賁者飾也。致飾然後亨。

註物相合則須飾以脩外也。

程傳物之合則必有文。文乃飾也。如人之合聚則有威儀。上下
物之合聚則有次第。行列合則必有文也。賁所以次噬嗑也。
東坡蘇氏曰：君臣父子夫婦朋友之際所謂合也。直情而行之
謂之苟。禮以飾情謂之賁。苟則易合。合則相賁。相賁則易以離。

賁則難合○難合則相敬○敬則久矣○

臨川吳氏曰○不執贄則不可以成賓主之合○不受幣則不可以成男女之合○賁所以次合也○

鄭孩如曰○亨者通也○文所以行吾之意○而通于彼此之間者也○訂疑舊說○以致飾○然後亨○屬下受剝○愚謂亨者通也○嘉之會也○原是好字○如何合剝○故斷屬上句○觀下文物不可以終盡○只承畫字○不承亨字可知○

則盡矣○故受之以剝○剝者剝也○

註極則喪實也○

程傳夫物至于文飾亨之極也。極則必反。故賁終則剝也。
南軒張氏曰。賁飾則貴于文。文之太過則又戒其質。故受之以剝。

訂疑剛毅本訥近仁。乃言令色鮮矣。仁枝葉盛則本實衰。此剝之所以次賁也。則盡之上當脫亨字。
漢上朱氏曰。此周末所以不勝其弊。文之末流也。

物不可以終盡。剝終必反。下故受之以復。

程傳物无剝盡之理。故剝極則復。陰極則陽生。陽剝極于上而復生于下。窮上而反下也。復所以次剝也。○陽无可盡之理。變

于上則生于下。无間可容息也。聖人發明此理。以見陽與君子之道不可亡也。或曰。剝盡則為純坤。豈復有陽乎。曰。以卦配月。則坤當十月。以氣消息言。則陽剝盡為坤。陽復來為復。陽未嘗盡也。剝盡于上。則復生于下矣。故十月謂之陽月。恐疑其无陽也。陰亦然。聖人不言耳。

或問伊川云。陽无可盡之理云。乃剝復相因之理。畢竟須經由坤。坤卦純陰无陽。如此則陽有漸滅也。何以能生于復。朱子曰。凡陰陽之生。一爻當一月。須是滿三十日。方滿得那腔子。做得一畫成。非是坤卦純陰便无陽也。○自觀至剝。三十日。剝方

盡自剝至坤三十日方成坤三十日陽漸長至冬至方是一陽
第二陽方從此生陰剝每日剝三十分之一一日方長得成一
陽陰剝時一日十二刻亦每刻中漸剝全一日方滿得三十
分之一陽長之漸亦如此或疑十月何以為陽月曰剝盡為坤
復則一陽生也復之一陽不是損然便生乃是自坤卦中積
且一月三十日以後之一陽分作三十分後小雪後便一日生
一分上面趨得一分下面便生一分到十一月半一陽始成也
以此便見得天地无休息處

雙峯饒氏曰十月雖當純坤之月而其實介乎剝復二卦之間

以言乎前半月則有剥而未盡之陽小雪以前以言乎後半月則有復而方生之陽小雪已後剥之陽方盡于上而復之陽已生于下矣是烏得為无陽乎知十月之非无陽則四月之非无陰亦可知矣此陰陽消長之理至精至微自程傳始發之然所言者其理耳而未有以驗其氣數之必然也朱子又從而推明之曰是當以一爻分十分陰陽日進退一分剥之陽剥于九月之霜降而盡于十月之小雪復之陽則生于小雪而成于十一月之冬至夬之陰決于三月之穀雨而盡于四月之小滿始之陰則生于小滿而成于五月之夏至于是理與數合然後知陰

陽絕續之際果无一息之間斷而程子之言為益信矣
訂疑窮上反下舊有就文質相勝說者既凋既琢還反于朴
慥曰枝葉摧而根荦萌也愚謂當就氣運說徐魯齋曰自責而
剝以人事言自剝而復以天道言○剝窮上剝字當作衍文
復則不妄矣故受之以无妄

程傳復則反于道也既反于道則合正理而无妄故復之後受
以无妄也

漢上朱氏曰復天理則无妄无妄則其動也以天
梁山來氏曰善端既復則妄念不生妄動不萌而不安矣

說統玩一則字所謂辨于物也。真妄必无相雜之理。有无妄然後可畜故受之以大畜。

程傳无妄則為有實故可畜聚。大畜所以次无妄也。

閻氏彥升曰无畜然後可畜。所畜者在德故曰大。

蒙引中實无妄然後其德可聚。充實而有光輝之謂大也。故无妄受以大畜。

梁山來氏曰无妄則誠矣。誠則好善如好之色。惡之如惡之臭。然後可以畜德而至于大。故受以大畜。

訂疑有字當作衍文。

物畜然後可養故受之以頤頤者養也

程傳物既畜聚則必有以養之无養則不能存息頤所以次大畜也

蒙引德既畜聚于已然後可以優游涵泳而充養之矣故大畜繼以頤訂疑與傳皆以養德言來氏同

說統萬物聚而養道備訂疑以養身言平庵項氏之說也

訂疑畜與養有別畜聚也聚其物以為養之具也小畜財大畜德此後受小畜庶而加富也无妄受大畜聚前言往行以畜德也

不養則不可動故受之以大過

註不養則不可動養過則厚

蒙引有大涵養則有大抱負有大抱負而後有大設施不養則不可動也大過者有大過之時有大過人之才而成大過人之

事功者也動者設施而見于用也

訂疑與圖氏同

說統自復至大過專主聖學聖賢无枝節之學問故始于能復而後其體立又无空疏之學問故終于可動而後其用行

圖氏彥升曰養者君子所以成己動者君子所以應物君子處則中立動則中行豈求勝物哉及其應變則有時或過故受之

以大過訂疑以過作過人之行與大象同義然似非此處正肯
朱子曰動則過矣故小過亦曰有其信者必行之故受之以小
過訂疑以過作行過去意似正肯與下文可接
物不可以終過故受之以坎坎者陷也

註過而不已必陷沒也

程傳理无過而不已過極則必陷坎所以次大過也

蒙引陷則止矣故曰過坎則止即此意也訂疑正意

訂疑離記曰張而不弛文武弗能也弛而不張文武弗為也一

張一弛文武之道也愚謂動靜相生循環之理聖賢豈能常動

而不止乎。故過而受以坎。坎者陷也。借陷為限也。

陷必有所麗。故受之以離。離者麗也。

程傳陷于險之中。則必有所附麗。離所以次坎也。

訂疑此言附人以濟險也。

游讓溪曰。陷必有麗。而後才有所施。謂可以扶危拯溺。而不終陷也。訂疑此可從。與程傳意同。

本義右上篇

臨川吳氏曰。呂大圭云。序卦之意。有以相因為序。如屯蒙需訟。之也。有以相為序。如泰否同人。是也。天地階不出。在因相反。

而已

蒙引傳中言不可者其例有二如物不可以終否之類以理之自然者言也如有大者不可以盈之類以理之當然者言也其言某者某也亦有兩端如屯者盈也之類則粘帶上文如震者動也之類則粘帶下文又如師者衆也之類則承上而起下文大抵承上起下者居多

梁山來氏曰物不可以終通終否終蓋終過以理之自然言也造化乃如此也有大者不可以盈不養則不可動以理之當然者言也人事乃如此也

有天地然後有萬物有萬物然後有男女有男女然後有夫婦有夫婦然後有君臣有君臣然後有上下有上下然後禮義有所錯夫婦之道不可以不久也故受之以恒恒者久也

註先儒以乾至離為上經天道也成至未濟為下經人事也夫易六畫成卦三才必備錯綜天人以效變化豈有天道人事偏于上下哉

程傳天地萬物之本夫婦人倫之始所以上經首乾坤下經首咸而繼以恒也夫婦之道終身不變者也

朱子曰夫婦之道即成也亦如上經不言乾坤但言天地則乾

坤可見也。問錯字陸氏有兩音。曰只作措字。謂禮義有所設。

施耳。

楊龜山曰。天地者萬物父母。咸怕人之父母。訂疑咸怕當作夫婦。

臨川吳氏曰。先言天地萬物男女者。有夫婦之所由也。後言父子君臣上下者。有夫婦之所致也。

平庵項氏曰。上下既具。則拜跪坐立之節形。而宮室車旂之制。設其行之。必有文。故謂之禮。辨之。必有理。故謂之義。蒙引夫婦者相託以終身。不可暫合。暫離者也。故咸繼以怕。

測言又從乾坤說起者見乾坤所以首全經也。說統言萬物則人在其中男女單就人說人為萬物之靈萬物无夫婦之義夫婦之義明而人道立矣。

訂疑或曰禮者萬世不易之經義者因時變通之權此說非也。禮必有義項氏云辨之必有理是也。如中庸宗廟之禮是禮所以序昭穆也所以祀乎其先也是義。

物不可以久居其所故受之以遯遯者退也。

註夫婦之道以怕為貴而物之所居不可以怕宜與世升降有時而遯也。

程傳久則有去相須之理也。遜所以繼怕也。

雙湖胡氏曰。此又借怕之名。泛論物義。若夫婦之道。豈可以不
久居其所乎。

蒙引。物之不可久居其所者。如人四十出仕。至老則當致仕。不
可久居其位也。又如天下有道則仕。无道則隱。不可恋位不去
也。只是功成名遂而身退之義。故聖人欲人知進而知退。知存
而知亡。知得而知喪。
林性之曰。久受尊名。則有不祥之患。久于祿位。則有取禍之機。
此物不可以久居其所也。

物不可以終遯故受之以大壯

程傳遯為違去之義。壯為進盛之義。遯者陰長而陽遯也。大壯陽之盛壯也。衰則必盛。消息相須。故既遯則必壯。大壯所以次遯也。

物不可以終壯故受之以晉。晉者進也。

程傳物无壯而終止之理。既盛壯則必進。晉所以次大壯也。

蒙引壯則必進。如人年壯德充。必進而有所為。所謂君子進德修業。欲及時也。此亦其一端。

進必有所傷。故受之以明夷。夷者傷也。

閻氏彥升曰。知進而不已。不知消息盈虛。與時偕行。則傷之者至矣。故受之以明夷。

傷于外者。必反其家。故受之以家人。

程傳。傷困于下。則必反于內。家人所以次明夷也。

閻氏彥升曰。以利合者。迫窮禍患。害相棄也。以天屬者。迫窮禍

患。害相收也。明夷之傷。豈得不反于家人乎。

蒙引。傷于外者。必反于家。以就安。訂疑。平正。與傳同。

家道窮必乖。故受之以睽。睽者乖也。

程傳。家道窮。則睽乖離散。理必然也。故家人之後。受之以睽也。

蒙引家道有時而窮窮則父或不父子或不子兄或不兄弟或不弟而乖離矣

訂疑程傳不明致窮之由張南軒謂由身不行道以致之然玩上下文及家人卦爻中安有身不行道之義乎蓋家道之窮由夷于外而致之蘇秦見擯于秦而歸父母不以為子嫂不以為叔妻不以為夫此夷于外而家道窮必乖之一驗也晉殷浩徙東陽年餘甥韓康伯辭歸浩送至水洲吟曹顏遠詩曰富貴他人合貧賤親戚離因泣下此家窮必乖之又一驗也世態炎涼不止親戚朋友即一家骨肉亦然聖人洞見世情而為此傷心

之語也。雜卦傳豐多故旅寡親亦是此義。

乖必有難故受之以蹇蹇者難也。

蒙引如人情義乖離必至相戕賊而難作矣。

梁山來氏曰一家乖睽則內難作矣。

說統古今大難多起于骨肉相戕。

物不可以終難故受之以解。

程傳物无終難之理難極則必散解者散也所以次蹇也。

解者緩也緩必有所失故受之以損。

程傳縱緩則必有所失失則損也損所以終解也。

朱子曰：緩是緩急之意，縱弛之類。

梁山來氏曰：緩則怠惰，偷安廢時，失事故受之以損。

損而不已，必益，故受之以益。

程傳：盛衰損益如循環，損極必益，理之自然。益所以繼損也。

說：統損益，共三卦，以國事言。漢文帝日減省而國家富庶，此損之必益也。唐德宗變林大盈，日盈日益，而有奉天之難，此益之必決也。

益而不已，必決，故受之以夬，夬者決也。

註：益而不已，則盈，故必決也。

程傳益之極必決而後止。理无常益。益而不已。已乃決也。夬所以次益也。

漢上朱氏曰。益久則盈。盈則必決隄防。故次夬。○蒙引益而不已。滿而溢矣。如富貴之極。必有出于禮制禁防之外者。

決必有所遇。故受之以姤。姤者遇也。

註以正決邪。必有喜遇。○梁山來氏曰。決去小人。即遇君子。所以夬受之以姤。

程傳決判也。物之決判。則有遇合。本合則何遇。姤所以次夬也。○說統決主開。遇主合。開則必合。決則必遇。

訂疑程傳說統不分君子小人。只泛言理勢。却平正。若如註與來氏說。決為去小人。是矣。始何為遇君子。便說不去。○決潰決也。離散之意。有散則有合。理勢之自然也。

物相遇而後聚。故受之以萃。萃者聚也。

程傳物相會遇則成群。萃所以次始也。○訂疑泛言理勢之自然。亦平正。

梁山來氏曰。君子相遇。則合志同方。故受之以萃。○訂疑時皆從之。

聚而上者。謂之升。故受之以升。

程傳物之積聚而益高大聚而上也故為升所以次于萃也
南軒張氏曰天下之物散之則小合而聚之則積小以成其高
大故聚而上者為升也

蒙引天下之物聚于下必升于上如拔茅連茹以類而進之謂
訂疑序卦傳中凡言物者皆泛論物理人事今學者拈得一題
便勁主張就治道說或就仕進說或就聖學說然有說得去者
亦有說不去者皆強扭不如就本文理勢淺之說則道所該自
廣如夬姤萃升困只宜泛說時皆就出處說便于舉業耳
升而不已必困故受之以困

程傳自下升上以為進也。不已必困矣。故升之後受之以困也。
梁山來氏曰：升自下而上，不能不用其力，升而不已，則力竭而困憊矣。

說統正所謂知進而不知退者也。語云：升高不知疲，竟作粘壁枯，即此意也。

困乎上者必反下，故受之以井。

程傳：承上升而不已，必困為言。謂上升不已而困，則必反于下也。物之在下者，莫如井，井所以次困也。
說統此井字，只取在下之義。

井道不可不革故受之以革

註井久則濁穢宜革易其故

程傳井之為物存之則穢敗易之則清潔不可不革者也故井
之後受之以革也

蒙引必革其舊汚而後可食也

訂疑後漢書禮儀志引古禮立秋後浚井改水是井道必革也

革物者莫若鼎故受之以鼎

程傳鼎之為用所以革物也變腥而為熟易堅而為柔水火不
可同處也能使相合為用而不相害是能革物也鼎所以次革

也。訂疑水火為用而不相害于章義為迂。

主器者莫若長子故受之以震。

程傳明者器也。震為長男故取主器之義。而繼明之後。長子傳國家繼位號者也。故為主器之主。序卦取其一義之大者為相繼之義。

漢上朱氏曰。明者宗廟之器。

震者動也。物不可以終動止之故受之以艮。艮者止也。

程傳動靜相因。動則有靜。則有動。物无常動之理。艮所以次震也。

物不可以終止故受之以漸漸者進也

程傳止必有進屈伸消長之理也

進必有所歸故受之以歸妹

雙湖胡氏曰夫子借歸之一字以論其序非以明卦旨也

蒙引如水之進必歸于海人之進亦必有歸宿之地訂疑

沈德培曰學无躐等漸進不已必有義理歸宿之地也訂疑以

學問言乃舉業之陋習試觀上下文安有此義

待其所歸者必大故受之以豐豐者大也

程傳物所歸聚必成其大故歸妹之後受之以豐也

雙湖胡氏曰○亦借歸字○泛論致豐之由○非取歸妹義矣○
蒙引此太山不讓土壤○故能成其大○河海不擇細流○故能成其
深之理○

梁山來氏曰○細流歸于江海○則江海大○萬民歸于帝王○則帝王
大○至善歸于聖賢○則聖賢大○故受之以豐○

窮大者必失其居○故受之以旅○

蒙引如富貴之極而驕○上則敗而反失其所有矣○故受以旅○旅
在外而不得其所安也○唐明皇宋徽宗是也○
訂疑不止人主士
庶人亦然

旅而无所容故受之以巽

程傳○巽○旅○親○寡○非○巽○順○何○所○取○容○苟○能○巽○順○雖○旅○困○之○中○何○往○而○不○能○入○巽○所○以○次○旅○也○

訂疑○只○取○巽○伏○巽○順○之○義○耳○不○取○入○義○巽○者○入○也○屬○下○句○巽○者○入○也○入○而○後○說○之○故○受○之○以○兌○兌○者○說○也○

平庵項氏曰○人○之○情○相○拒○則○怒○相○入○則○說○故○入○而○後○說○之○

說而後散之故受之以渙

程傳○人○之○氣○受○則○結○聚○說○則○舒○散○故○說○有○散○義○渙○所○以○繼○兌○也○姚○胤○昌○曰○義○理○不○深○入○則○不○能○得○其○趣○苟○能○虛○心○遜○志○以○入○之○

則不覺義味深長、有趣雋永、而說矣、說不過與義理決洽久之、
將天機泮渙、意氣舒暢、直到手舞足蹈地位、故曰說而後散之、
說即深造自得之機、散則和順積中英華發外之謂也、訂疑此
本論語集註說在心樂主發散在外而說未必正旨、

訂疑聚散離合亦人情物理之常、自歸妹而豐、自豐而旅、此聚
而散、合而離也、自旅而巽、巽而兑、此離而合、散而聚也、自兑而
渙、又合而離、聚而散也、故下文曰、渙者離也、物不可以終離、
渙者離也、物不可以終離、故受之以節、

程傳物既離散、則當節止之、節所以次渙也、

節而信之故受之以中孚

訂疑程傳文義不屬蒙引主節于上者不信則下疑亦不分明
愚謂節而信之言節而後信之也脫一後字耳古者有符節以
為信周禮地官有掌節掌守邦節而辨其用以輔王命凡邦國
之使節山國用虎節土國用人節澤國用龍節關門用符節貨
賄用璽節道路用旌節皆有期以反節凡通達于天下者皆有
節以傳輔之无節者有幾則不達○幾與譏同若无節者則關
門譏察之執之不使行也此節而後信之義也自節而信之
至有其信者必行之皆此一意耳按楊升庵亦如此說

有其信者必行之故受之以小過

程傳人之所信則必行行則過也小過所以次中孚也訂疑用
註說

註守其信者則失貞而不諒之道而以信為過故曰小過

平庵項氏曰有其信猶書所謂有其善言以此自負而居有之也自恃其信者其行必果而過于中

臨川吳氏曰過者行動而踰越之也故大過曰動小過曰行凡動未至其所為未及既至其所為至既至而又動又行則為踰越而過也

訂疑諸家皆作不好說。今按上下文既无不好意而序卦傳例凡有字句法最多。絕无異解。如有事而後可大有无妄而後可畜有字皆不作有其善之有字亦不作守字解也。必字句法亦多。无有作必信必果之必者。不合此處獨深一層也。愚謂不養則不可動。朱子小註動則過矣。故小過亦曰有其信者必行之。動字承上動字亦未嘗以動字行字為不好字也。此只借過字為行得去之義。非過失之過也。必行之即掌節之所謂通達于天下耳。自節而信之至此只一意相承。有過物者必濟故受之以既濟。

程傳能過于物必可以濟故小過之後受之以既濟也
南軒張氏曰能高于人而過之然後可以濟天下

紫引有過人之才者方能濟事

物不可窮也故受之以未濟終焉

程傳既濟矣物之窮也物窮而不變則无不已之理易者變易
而不窮也故既濟之後受之以未濟而終焉未濟則未窮也未
窮則有生之義

紫引物不可以終窮者循環之理天地人物俱不能達也故以
未濟終焉此動靜之所以相生陰陽之所以交變而萬化萬事

之所以无窮已也。鄭申甫曰：物不可窮，一句括盡全經之旨。六十四卦，每卦反對一盛一衰，一往一來，如否泰損益，夬姤其著者，皆不可終窮之意。

本義右下篇

朱子曰：序卦首言天地萬物男女夫婦，是因咸恒為夫婦之道說起。非如舊人分天道人事之說。大率上經用乾離為始終，下經傳常用艮兌巽震為始終。

問：易上經三十卦，下經三十四卦，多寡不均，何也？朱子曰：卦有

正對有反對、乾坤坎離頤大過中孚小過八卦正對也、正對不變、故反復觀之、止成八卦、其餘五十六卦反對也、反對者皆變、故反復觀之、共二十八卦、以正對卦合反對卦觀之、總而為三十六卦、其在上經不變卦凡六、乾坤坎離頤大過是也、自屯蒙而下二十四卦、反之則為十二、以十二而加六、則十八也、其在下經不變卦凡二、中孚小過是也、自咸恒而下三十二卦、反之則為十六、以十六而加二、亦十八也、其多寡之數、則未嘗不均也、訂疑此亦未子偶然見到如此、未必是分經上下篇本意、

西溪李氏曰、上篇首乾坤終坎離、下篇首咸恒終既濟未濟、亦

坎○離○也○天○地○之○道○不○過○于○陰○陽○五○行○之○用○莫○先○于○水○火○上○篇○首○
天○地○陰○陽○之○正○也○故○以○水○火○之○正○終○焉○下○篇○首○夫○婦○陰○陽○之○交○
也○故○以○水○火○之○交○終○焉○

厚○齋○馮○氏○曰○乾○上○坤○下○離○東○坎○西○此○先○天○之○易○天○地○日○月○之○四○
象○也○故○居○上○經○之○始○終○以○立○造○化○之○體○山○澤○通○氣○雷○風○不○相○悖○
水○火○相○逮○此○後○天○之○易○六○子○之○用○也○故○居○下○經○之○始○終○以○致○造○
化○之○用○既○濟○之○後○猶○有○未○濟○者○示○造○化○之○用○終○則○有○始○也○

雜卦傳

註○雜○者○雜○糅○衆○卦○錯○綜○其○義○或○以○同○相○類○或○以○異○相○明○也○

朱子曰、雜卦反對之義、只是反復。則其吉凶禍福、動靜剛柔、皆相反也。又曰、序卦雜卦、聖人去這裏、見有那无緊要底道理也。說則箇然雜卦中、亦有說得極精處。

廬陵龍氏曰、按春秋傳釋繫辭、所謂屯固比入、坤安震殺之屬、以一字斷卦義、往古筮書多有之。雜卦此類是也。

蒙引反對之義相連、不必謂何者為反、何者為對、不必謂何者為反對、何者為正對。

訂疑卦相反對、不名反卦、而名雜卦者、蓋序亦以反對為序、此傳則无復次序、故曰雜卦也。

乾剛坤柔比樂師憂

蒙引乾純陽性情則剛也。坤純陰性情則柔也。訂疑序卦雜卦皆以乾坤為首。乾坤易之綱領也。故繫辭傳中多稱乾坤而不及他卦。註親比則樂。動衆則憂。

閻氏彥升曰。比順從故樂。師行險故憂。

息齋余氏曰。在上而得衆故樂。居下而任重故憂。

說統得衆而道可大行。故樂。統衆而機難豫剛。故憂。

臨觀之義或與或求

註以我臨物故曰與物來觀我故曰求○訂疑本義從之
飛○航○講○容○保○无○疆○以○惠○與○民○教○思○无○窮○以○教○與○民○建○中○于○民○
于○我○求○中○表○正○于○民○民○于○我○求○正○

屯見而不失其居蒙雜而著

本義屯震遇坎云

蒙引屯以初言謂初九陽動而又利居貞也○蒙以二言九二陽
混陰中昭然為發蒙之主也

震起也艮止也損益盛衰之始也

註損極則益益極則損

節齋蔡氏曰損者盛之始益者衰之始

註蔡氏以流行言此以對待言

訂疑損下益上為衰之始損上益下為盛之始意言曰國之盛

衰視民之休戚故損下為衰之始益下為盛之始損之彖曰損

下益上其道上行益之彖曰自上下其道大光

大畜時也无妄災也

本義止健者時有適然云々

訂疑大畜卦辭有不家食之時无妄爻辭有无妄之災有萃有

萃聚而升不來也謙輕而豫怠也

註來還也。方在上升。故不還也。謙者不自重大。

朱子曰。輕是自謙。抑不自尊重。說豫之極。便放到了。

柴氏中行曰。謙者視己若甚輕。豫則有滿盈之志而怠矣。

蒙引。謙則不自滿。而下人。豫則自放而急于人矣。

說統像作逸豫之豫。

噬嗑食也。賁无色也。

註飾貴合衆。无定色也。訂疑節齋蔡氏從之。

本義曰。受采。○白雲郭氏曰。賁以白賁无咎。故无色。則質全有。

天下之至賁存焉。

訂疑註說雖未融然猶不失貴字之義本義亦然郭氏之說則
于貴飾之義全相悖矣
蒙卦此以食色相對
訂疑无字當作衍文耳

兌見而巽伏也

本義兌陰外見巽陰內伏

隨无故也蠱則飭也

本義隨前无故云
訂疑前字无味當作特

平庵項氏曰隨以无故而偷安蠱以有故而脩飭聖人不畏多

難而畏无難也

剝爛也復反也

註物熟則剝落也

漢上朱氏曰剝爛五陰潰于内也○進齋徐氏曰剝爛則陽窮于上復反則陽生于下猶果之爛墜于下則可種而生矣○梁山來氏曰剝則生意消盡而歸于无復則生意復萌而反于有

晉晝也明夷誅也

註誅傷也○訂疑本義從之

隆山李氏曰。晉晝則明夷為夜。明夷誅則晉為賞。錫馬三接。賞也。南狩得大首。誅也。

訂疑。晉晝取卦辭。晝日之義。亦卦象有明出地上之義。井通而困相遇也。

註井物所通用而不吝也。困安于所遇而不濫也。

本義剛柔相遇而剛見揜也。

平庵項氏曰。以通與遇相反對。則遇為相抵而不通之象矣。訂疑。井通取往來井。井收勿幕之義。遇取困亨貞窮而通之義。

咸速也○恒久也○

訂疑本義○複舉本文○无味○聖人感人心○而天下和平○咸速也○孔子曰○德之流行○速○千○置郵而傳命○是也○聖人久于其道○而天下化成○恒久也○孟子曰○文王之德○百年○尤未洽于天下○武王周公繼之○然後大行○是也○

渙○離也○節止也○

解○緩也○寢難也○

蒙○引○緩○從容安舒也○難急難也○

訂疑亦用序卦而義不同○序卦之緩○待緩也○故受之以損○此如

蒙引之說

睽外也家人內也否泰反其類也

註外相疎外也

訂疑外內見序卦

大壯則止遯則退也

註大正則小人止小人亨則君子退

臨川吳氏曰大壯四陽進而陰消遯二陰進而陽消慮後陽之
恃其壯故不欲九四之進而欲其止慮前陽之不及遯故不欲
六二之進而欲其退也聖人于五陽之與亦不欲五陽之輕進

于一陰之始亦唯欲陰之不進蓋同此意也訂疑此說辭費大
壯說欲陽之止猶易遜說欲陰之退則難也而專以九四六二
說猶偏蒙引可從

蒙引慮陽之恃其壯而失防陰之道故欲其止慮陰之遂其進
而肆害陽之心故欲陽之退
梁山來氏曰止字乃上字之誤

大有衆也同人親也革去故也鼎取新也小過過也中孚信也
蒙引所同之人乃其親厚者又非衆之泛泛者此亦反對之義
小過有過也中孚則信實无過也過也之過只借過字之義小

字无干

梁山來氏曰、過者踰其常、信者存其誠、

豐多故也、親寡旅也、

註高者惧危、滿者戒盈、豐大者多憂故也、親寡故寄旅也、

本義既明且動云、訂疑亦似從註、

平庵項氏曰、卦名皆在句上、旅獨在下者、取韻叶也、訂疑謂叶

下文下處二字之韻、

訂疑當作旅寡親也、則叶上文親新之韻、

平庵項氏曰、以多故對寡親、則故非事故之故、凡物之情、豐盛

則故舊合羈旅則親戚離○梁山來氏曰處豐盛故多故舊人在窮途故寡親戚

訂疑項氏來氏之說極確論語君子篤于親故舊不遺又曰君子不施其親故舊无大故則不棄也檀弓孔子曰故者无失其為故也親者无失其為親也皆以親對故言也晉殷浩徙東陽其甥韓康伯辭歸浩吟曹顏遠詩云富貴他人合貧賤親戚離因泣下亦此二卦反對之意

離上而坎下也

本義火炎上水潤下

小畜寡也。履不處也。

本義不處行進之義。

蒙引小畜以一陰而當衆陽之衝。欲止之而不能止。寡故也。履以和說而躡剛強之後。欲自進而遂其進。進則不處也。亦有反對之義。

訂疑履不處人多以為柔能制剛。今觀卦爻之中。无制剛之義。雜卦傳中但云不處亦不言制剛也。愚謂一柔同也。以之畜陽則不足。而曰小畜言不能制陽也。以躡剛陽之後則得遂其進而不處。見陰不可當陽之前。而畜陽但當處陽之後而隨之以。

進也亦反對之義

需不進也訟不親也

註不進畏險而止也

條山李氏曰乾上離下為同人離為火火炎上而趨乾故曰同人親也乾上坎下為訟坎為水水性就下與乾違行故不親也訂疑臨疏爭渡者人情也需却有所待而不進是相遜而不爭也訟起于爭而不相親遜此反對之義也

大過頤也

進齋徐氏曰本末弱故頤訂疑用註說

姤遇也柔遇剛也

漸女歸待男行也

朱子曰女待男而行所以為漸

頤養正也既濟定也歸妹女之終也未濟男之窮也夬決也剛決

柔也君子道長小人道憂也

鄭氏康成曰自大過以下卦肯不對似錯亂失正弗敢改耳

本義自大過以下卦不反對云々

節齋蔡氏曰按雜卦例皆反對叶韻為序今以其例改正大過顛也頤養正也既濟定也未濟男之窮也歸妹女之終也漸女

歸待男行也。姤遇也。柔遇剛也。夬決也。剛決柔也。君子道長小
人道憂也。

建安丘氏曰。今以蔡易讀之。則八卦既得以類從而韻亦叶。但
不當僭改經文耳。

訂疑固哉。丘氏之為易也。所謂不宜僭改者。可以改。可以不改。
者爾。如確有所見。可以考諸先聖而不謬。俟諸聖人而不惑也。
孔子不正詩正樂乎。程子朱子不更定大學乎。如天一地二節。
舊文在第十章之首。朱子因程子改之。天數五節。舊本在大衍
之後。朱子改之。何後世不識其僭也。愚謂改經之例。當于本文。

之下明註原○本○某○文○在○某○處○今○改○在○此○如○大○學○章○句○與○天○一○地○
二○章○本○義○云○不○可○遂○絕○滅○舊○本○即○此○便○是○闕○文○闕○疑○不○敢○自○
是○之○心○耳○

愚○依○蔡○易○而○稍○更○之○曰○順○養○正○也○大○過○顛○也○顛○典○因○切○與○上○文○
親○字○叶○為○一○節○順○之○辭○曰○順○貞○吉○養○正○之○謂○也○大○過○之○辭○曰○棟○
桡○豕○傳○本○末○弱○也○顛○之○謂○也○一○正○一○顛○相○反○對○
漸○女○歸○待○男○行○也○歸○妹○女○之○終○也○既○濟○定○也○未○濟○男○之○窮○也○定○
叶○音○庭○與○行○終○窮○叶○
註○待○男○行○女○從○男○也○女○終○于○出○嫁○也○

節齋蔡氏曰。既濟六位皆當故定。○滿氏夢旂曰。事已濟則定矣。

朱子曰。張敬夫說伊川之在洛也。方讀易有籊補者。以未濟男之窮問伊川。不能答。其人曰。三陽失位。伊川謂是不知此語。大珠林上已有。蓋伊川未看雜書。所以被他說動了。

訂疑因三陽失位之說而推之。則既濟為三陽得位矣。故曰定。又上坎下離。中男在上。中女在下。得男女之定位。又坎正位在五。離正位在二。又卦之六爻。三陰三陽皆得正位。亦定之義也。又詩曰。文定厥祥。註文禮祥吉也。言卜得吉。而以納幣之禮定。

其祥也。按俗云：定婚定禮，既濟定也。或取大定之義乎？此四卦皆以婚娶之事言之。定與窮反對。姤遇也。柔遇剛也。夬決也。剛決柔也。君子道長，小人道憂也。訂疑柔遇剛也。下似宜有君子道消，小人道長也。二句與君子道長，小人道憂也相反對。韻亦叶。上繫第二章蒙引曰：自古聖人各有易法。如變易、商易、占辭與周易不同。安知不別有占法乎？易有反對之義。凡氣化之消長，人事之得失，皆反對者也。于卦圖上看，无一卦一爻无反對者。而消長得失之理，進退存亡之道，固隱然有可推者。此意不足以斷吉凶哉。愚疑此雖卦

傳亦安知非易中之一義乎。

卷之十五終

目錄

卷之十五終

東

五